

Ale są ti chłopi zli

„Tatk je zli – kùnc mùzyczi! „kiedy Ojciec rozgniewany siecze, szczęśliwy, kto się do Matki uciecze”. Jo. Chłopi są wiedno ti nògòrszi. Na nich mòżna jagòwac, ùscygòwac – bò to nie są białcz. Na białkã leno dobrze mòże gadac. Chwalęc jã mòże, wielbic. Słowa pròwdë ni mòże rzec. Ò wstëdlëwé tematë nie pëtac. Nawetkã sã docëgac, ò co jidze, nie je wòlno. Z białcz ni je nót szpòrtów robic. Jistno jak z zëdama. Czej robisz jinak – tej jes seksystą a antisemitą. Na kògò za to mòże

„nadawac”? Kò na chłopów, a nòlepi na ksązi, bò òni zgòdno z Ewanielią jesz drëdżë lico nadstawia do mùczkòwaniò. I mùczkùją, w całoscë ny z lewi starnë òbswiëcony, a szczwią, a jurzą. A sã szãtolą pò internetach, a pëskùją, jak to jima je zle, a co je jinyma nót wzac a co zakazac – mò sã rozmiòc, cobë lëdzóm bëło lepi... Jim je wëzi taczi sztrudrowóny, tim wikszi mò żòl do swiata. Nòlepi sã wëzëc na tëch, co sã nie mdą brònic. A czej chto próbùje sã procëmstawic, pòzëwają to „mòwą niezgarë” i ajtakùją człowieka jak wscektë scërze. A chłop je wiedno do bicò. Nié bez przëtròfk mówi sã prawie „knòp do bicò”. A knòp to je wnetkã chłop, nié? Në tej palcòter w pajã a szmëksómë!

Chłopi są gòrszim zortã człowieka. Nie są taczi snòzi, piãkny jak białcz. Taczégò głòdczégò cała ni mają. Wszãdze zarosti są, czãsto a gãsto w taczich placach, dze włosëska nie są nijak pòtrzebne. Në bò za piãrdã są włosë w ùszach? Abò w nosu? Mòże prawie za piãrdã... Në, wejle. Chłopiska nie pòchną za dobrze. Czemu? Nie je dokładno wiedzec. Złostlëwi gòdają, co sã chłopi nie mëją. To je też. Mëją sã, leno w jinëch mòlach. Kąsk skarnie, përznã rãce. Jak co na nodzi skapnie – to też. Kòmù bò to wadzy?! Póczi sã na sedzãczkã do stòłka nie przëlëmi, wiedno wiater òbwieje. Do te jakã parfimã sã smród pòswiãcy... Czej ceptò je, z mòkù sã skòrëpa robi, tej to sã skruszi. A jakò òbszczãdnosc wòdë! Chłopi są dzël òbszczãdniësz, bò mni na nich sã wëdòwò. Mni wòdë. Ceptła mni. Wtulni sã taczi w swòjã białeczka i mù nawetkã



CHŁOPI SĄ GÒRSZIM ZORTĀ CZŁOWIEKA. NIE SĄ TACZI SNÒZI, PIĀKNY JAK BIAŁCZI. TACZÉGÒ GŁÒDCZÉGÒ CAŁA NI MAJĄ.

zëma stolecò nie przeszkòdzò. A jesz sami grzeją jak kachlany piëck. (Białkóm je wiedno zëmno. Czej bez lata òd chłopa no ceptò pòbierze – na starosc nim chòpie. To sã nazëwò „ùderzenia gòracoscë”). Chłop nie jé nadaremno. Czej ju zjé, to z głodu stolëmnégò, bò òn na familiã zarobic mùsz. Do te je nót miec mòc. Co z tegò, że czasã za wiele wëpije?! Tec to nie je wielbłąd, cobë z pùklã a sëchim pëskã pò saharach wanożił! Chłop za wiele nie wanożi, w całoscë na stòrë lata. Ròd sedzy doma abò w jaczim swòjim kabùskù z nòrzãdłama, dze wstec je co do robiwaniò. A za czym

pò swiece sã tñëc, czej wszãdze je biëda jednakò? Mòże so internetë zapalëc a òbezdrzec nã całã swiatowã żòrotnosc za darmò. Radio a zdrzëlnik stoją dòwno zapiszoné w sklepie, bò ti cëgòni z Warszawë jaczës abònamehtë za to chcelë... Tej-sej jakò babcza wëcygnie starka do kòscoła abò na jakã aùtobùsowã pielgrzimkã zez parafie. Chłopiszczë z mùszu na to jadze, w dzëlu, cobë miec towarzëstwò a co jesc bez nòblëższë dnië doma. Mni mò téz do stëchaniò... Chłopi krodzy żëją. I ti młodi, co jima gòracò krew kòże nëkac na karkù złòmienié. I starëszkòwie, co dzywno czemu są we wikszoścë przez swòje białcz przëziwóny. Chłop je dzël stabszi òd białk. Czejbë bëł mòcny – to bë dzecë rodzył. Co to dówò, że mò mùskùle jak miedwiëdz, czej przë krwie pòbiëranim taczi mgleje...? Kò to je sromòta dlò chłopsczégò zortu! Chłopi nie są tak mądri jak białcz. Żòdnò pòrzãdnò białka nie zdrzi za cëzymã chłopama z gòtima nogama. A chłopi? Mało sobie szëjisków wkòt nie òbkręcã! Tak slëpcëją! A jak jakò letniczka sã wëna-gòli na piòskù nad wòdã òb lato (Kaszëbczi taczich wëstòwków na przëgrzechã lëdzkã nie robią) – jãzëczy sã jima jaż do kòlón piëndlają! Chłopi gòlą sã a z włosama robią pòrzãdk tej, czej ju słabò widzą abò kòszlë ni mògą zapnac. Cobë gazëtã czëtac, nie je mùsz jic do balbiërë! Tóni doma przëczëtac a czas òbzorgac. Feminystczzi wierã rzekną, że chłopi nie są w całoscë brëkòwny... Dolëbóg, jesz za nama zatesknita!



TÓMK FÓPKA